

Vizyon

SPPF i rod sekour IMF

Apre tou sa bann lannen kot SPPF in anbet lepep Seselwa, ozordi zot pe taye pou rod led IMF. Annou pa oubliye ki Mr. René ti dir ki IMF 'pa en Bondye', e ki Mr. Michel ti tou-l-tan dir ki Sesel pa bezwen IMF. Alor akoz ozordi zot pe taye pou rod IMF. Avan menm ki bann-la i debark Sesel, SBC in fini anonse ki zot pe rantre. Ou tya kwar SBC ti pe anonse ki Sesel in ganny son premy meday lor dan Olenpik!

Sesel i dan en gro kriz

Pandan tou sa bann lannen SPPF in refize koz laverite lo nou sitiasyon ekonomik. Zot in donn lenpresyon ki tou keksoz i ok, e ki pei pe pas zis dan en pti difikilte. Sa ki SPPF ek son bann dirizan in refize dir avek lepep Seselwa se lefe ki nou pei i dan en gran kriz ekonomik. Seselwa ti vreman soke pou antann Kaptenn Adam ek Mr. Afif aksepte bann laverite lo sitiasyon nou pei. Pou premye fwa Gouvernman in aksepte ki zafer i sal e ki zot bezwen

pran desizyon lo ki mannyer pou rezourd sa sitiasyon vreman grav.

'SNP was right'

Apre plis ki 10an depi ki nou pe koz lo sitiasyon ekonomik Sesel e ofer bann solisyon lo ki mannyer pou avans devan, finalman SPPF in rekonnnet ki SNP ti annan rezon. Konmdir Angle 'SNP was right!' I malere pou dir ki apre ki kabri in byen manz salad, se la aprezan ki SPPF i anvi pous kabri. I malere akoz lavi nou pep i deza pli difisil e serten fanmiy in fini gout lamizer ek lapovrete. E pourtan si selman lepep Seselwa ti ekout laverite ek realite ki SNP tya pe met devan zot, zanmen nou ti pou ariv dan sa sitiasyon terib ozordi.

Jj in bat latet Seselwa

Keksoz ki tou Seselwa pe realize ozordi, se ki Jj ti vin bat latet nou pep. Oli tou sa bann gran promes pou met plis larzan dan pos Seselwa, pou fer desann pri lavi e pou fer lavi vin meyer? Eski pa Mr. Michel ki ti dir

byen for zanmen i pou devalye rroupi? I kler ki tou sala ti zis en bann mansonz zis pou ganny vot Seselwa, kan i ti byen konnen ki olye plis larises, lepep Seselwa ti pou konn plis lamizer? Eski sanmenm sa kalite politisyen ki nou pei Sesel i bezwen? Oubyen eski i pa ler pour Mr. Michel realize e aksepte ki in fel lepep Seselwa e meyer keksoz ki i kapab fer se pour li demisyonnen?

Lavenir Sesel i avek SNP

SNP i annan lentere Sesel a-ker. Nou met devan nou bann lide, e pour sak eleksyon nou vin devan lepep avek en program. SPPF pa zanmen fer sa. SNP i konnen kwa ki i koz lo la e ki mannyer pou organiz nou pei afen ki Seselwa i ganny en meyer lavenir. Seselwa, ouver nou lizye byen gran. Ozordi fodre ki ou rezet bann mansonz SPPF e atas ou avek en bon lavenir ki SNP pe ofer. Donn SNP ou sipor!

Jj in fini avek Seselwa!

Apre tou sa bann lannen kot SPPF in dir ki zot debout lo kote Seselwa, ozordi Mr. James Michel i dir 'Fini sa letan ki gouvernman pou donn lepep sa ki i bezwen!' Bann gran siporter SPPF menm in soke pou antann sa kalite deklarasyon sorti kot Jj. Rezon i tre senp: Pour eleksyon 2006, Mr. Michel ti dir ki li i pou regard bezwen lepep Seselwa e asiste zot.

I ti dir byen for ki si lepep i vot pour SNP sa pa ti pou arive. Ankor enn fwa lepep Seselwa i war en lot mansonz ki Jj in servi pou bat latet lepep Seselwa avek. Sa deklarasyon i montre en sanzman konplet lo plan ki Mr. Michel ti prezant devan Seselwa pour elskyon prezidansyel. I en dimoun ki'n azir malon-

net e bat latet zis pou ganny en vot. Dimoun i totalman dezapwente.

Apre ki in promet Seselwa en meyer lavi e en bon lavenir, ozordi Mr. Michel pe dir avek sa menm pep ki fodre zot debouye lo zot menm. Sanmenm sa nou war ki i nepli enterese pou rod soulaz bann ki pli feb e pli vilnerab. Pri lavi i kontinyen ogmante, manze i vin pli ser, e dimoun i war li difisil pou fer sa 2 bout zwenn, e malgre sa Mr. Michel pa fer nanryen pou soulaz soufrans sa pep.

Elektrisite ozordi in vin kosmar laplipar fanmiy Seselwa. PUC zis i koup kouran kot bann lakaz ki pa'n peye. Sarz rekoneksyon in double pou vin plis ki R100. Servis bis lanterman in sot R1000, e tou bann lezot servis osi in ogmante. Dan milye tou sala, Mr. Michel i

anvoy en mesaz tre kler lo SBC Dimans pour tou Seselwa: 'Fini sa letan ki gouvernman pou donn lepep sa ki i bezwen!'

Mr. Michel in trai konfyans sa bann dimoun ki ti vot pour li. Ozordi i enterese zis avek Arab ek bann ki annan larzan. Se sa bann dimoun ki ganny tou konsesyon e pli byen pase dan Sesel. Ou bezwen zis regarde kote i ti fer sa deklarasyon pour ou konpran sa. Sete Port Launay kot Kaptenn Adam ek son group in ganny sa gran propriete kot Seselwa byento pa pou kapab al lo lans pou fer piknik.

Seselwa, ouver byen nou lizye e konpran sa ki pe pase otour ou. Jj in fini servi ou. Ozordi i pa bezwen ou. Letan lot eleksyon i arive ki i pou bezwen ou. Aret les ou ganny pran pour en lenbesil. Ozordi ou osi ou devret dir avek Jj ek SPPF 'Fini sa letan kot SPPF ek Jj pou kontinyen pran Seselwa pour bann enbesil gran zorey!'

Ki Kantite Koripsyon i annan Sesel?

Tou dimoun ki'n swiv program 'Fas-a-Fas' ti soke avek en deklarasyon ki Kaptenn Adam ti fer. I ti dir 'Kont SEPEC pa ganny odite, e si mon ti oule, mon ti kapab vol 20 milyon dolar tou le zan!' Sa imsyé ti menm azoute ki malgre i dir avek Gouvernman vin odit bann kont, zot pa vin fer li. Kestyon ki tou Seselwa pe demande se 'Ki kantite larzan leta in disparet atraver koripsyon dan larzan lepep?'

Byensir sa kalite deklarasyon i fer tou dimoun poz sa kalite kestyon. Vi ki nou'n osi deza antann tou kalite zistwar lo bann milyon ki'n disparet, i fer keksoz vin pli grav. Si li Kaptenn Adam i dir i pa'n vole, eski nou kapab dir ki sa i aplik pour tou bann dimoun ki dan sa bann lakonpanyen ki pa ganny odite? Kote nou pou konn laverite?

Elektrisite fodre Desann

Lepépe pe eksprim lakoler dan lafason ki gouvernman in fer desann pri benzin ek dyezel. Ki mannyer ler i monte, i ogmant par R4, me letan i desann i zis par 50 sou? Me dimoun i osi ekspekte ki elektrisite osi i desann aköz letan i ti monte, PUC ti dir klerman ki sa i aköz pri lo marse mondyal in monte.

Gouvernman pe zwe trik avek nou. Letan pri karbiran ti pe vann \$113 en barik, isi ti R11.50 en lit lo laponp. Apre ki i ti ogmante e ariv pre \$150 en barik, isi lo laponp osi ti monte. Ozordi en barik i kout \$113 en barik. Isi Sesel aköz ki pri pa retourn R11.50?

Laverite se ki Gouvernman pe esey ranmas plis larzan posib aköz lekonomi pabon. Pre avek eleksyon, zot a larg ankor pou anbet nou!

In annan plizyer lakonpanyen paraetatik kot bann keksoz in ganny kontrole par enn de sef, e Oditer Zeneral pa'n ganny akse avek zot bann kont. Souvan se sanmenm sa bann lakonpanyen ki nou osi antann pe fer tou kalite aktivite kot larzan i al dan bann diferan kont eksepte kont leta. Eski pa sanmenm ki fer Seselwa poz kestyon lo ki kantite koripsyon i kapab ekziste dan nou pei?

Annou pa oublie ki koripsyon i enn bann sours prensipal kot larzan leta i disparet e fer nou pep viv dan soufrans parey ozordi. Koripsyon i osi permet serten dimoun viv byen, abiz lo resours leta, tandi ki lepep i soufer e pri lavi i monte. Annou pa oublie ki serten sa bann dimoun ki'n byen pase, pa santi soufrans ki lepep i santi.

Seselwa i soke aköz Kaptenn Adam in dir ki li i tya kapab vol 20 milyon dolar sak lan-

nen. Me selman nou osi konnen ki bokou pti dimoun in ganny kondannen pour lapenn zot in vol detrwa mil roupi. Sa ankor enn fwa i mon tre en lot realite Sesel. Sa ki kapab vol en ta milyon i kapab fer li san problemn tandi ki sa ki pran en pti git ki ganny kondannen!

Seselwa, ankor enn fwa nou demann zot pou konpran byen sa ki pe pase otour zot. reflesi byen lo tou sa bann gran deklarasyon ki'n ganny fer dan sa bann program 'Fas-a-Fas.' Konpran byen ki ozordi dan Sesel Mr. Michel in perdi tou kontrol e ki nou pei pe tap lo brizan. Nou sitiasyon pa dan bon. Si keksoz i kontinyen dan menm direksyon ki i pe ale. nou pe al ganny tape avek en lot laroul devaliasyon, e pri manze pou ogmant ankor. SPPF ki responsab pou met nou dan sa salte! Pa vin sant zistwar avek nou ozordi.

Jj pe vann e pe detri Sesel

Mr. James Michel i kapab mont lo tou sa SBC e koz pour lakantite letan ki i oule pou dir i pa pe vann Sesel. Larealite e laverite se ki tou dimoun i konnen ki in fini vann Sesel dan en fason kot i pe permet nou zoli pei ganny detri avek serten proze ki pa fer sans.

Mr. Michel i dir i pa pe vann Sesel, me ki bann investiser i pas bay 99an? Me selman dan tou sa bann kontra, i osi dir ki sa bay i kapab ganny renouvle. Lekel ki pou kwar ki en lakonpanyen ki'n konstri e antretenir en batiman pou rann sa avek gouvernman apre sa letan? Lekel ki bann fou-bet? Lepep oubyen Michel?

I malere osi pou dir ki ozordi letan ou

antann sa bann kalite deklarasyon, ou osi war ki mannyer nou pei in ganny detri. Bann investiser pe ganny drwa pou fer sa ki zot arvi zis aköz zot annan larzan. Par egzamp, byento en lot por pe al ganny fer pour lotel Ste Anne, e sa pou fini detri sa 'Marine Park' dan sa rezyon. Lotel Emirates pou ganny drwa fer bann lasann par lao delo sale, malgre ki sa pa permet dan lalwa 'planning'. Eski sa pa apel detri?

I annan en kantite konstriksyon ki al kont bann regilasyon, me selman zis aköz zot bann investiser etranze, tou i permet. Me selman si en Seselwa ordiner ki pe konstri son lakaz pa swiv lord planning, i ganny demande deswit pou kas tou kek-

PAS PARTOU

Sef tya pe kas makadanm

Pandan ki Jj tya pe ganny maltrete avek bann aktivis lo size pri lavi ki'n vin tro ser, Gran Sef tya pe kas makadanm dan son biro! Ki mannyer eski tou sala i apele? Eski i nepli enterese pou retir pei kot in met nou? Oubyen eski i annan lezot priorite tel ki son laferm?

Avyon plis ki 24an

Regilasyon gouvernman ozordi i defann nenport dimoun enport en lot 2enn men. Me selman sa menm gouvernman i fer vini en vye avyon plis ki 24an ki kase tou lazourmen! Sov Nou!

Youth Fun Walk

SNP pe organiz en 'Youth Fun Walk' **Dimans le 14 Septanm aparti 9am. Sa lamars pou komans Danzilles. Bel Ombre ziska Anse Mazar. Tou zenn i ganny envite pou partisipe.**

1418

Read the SNP Youth e-newsletter '1418' : www.snpseychelles.sc/1418.htm
Youth for a better future

MNA SPPF i dir tou keksoz i ok

Pandan ki SNP pe demande ki gouvernman i pran bann bon mezir pou fer bese pri lavi aköz Seselwa pe soufer, bann MNA SPPF dan Lasanble pe dir ki tou keksoz i ok, e ki fodre kontinyen dan menm direksyon. Sa i vreman tris e i montre nou en parti politik ki'n fini bite e ki pe zis vin anbet lepep Seselwa.

SNP i demann en sanzman e enplor gouvernman pou fer desann pri lavi e anpes nou pep kontinyen soufer. Silvouple, pran konsiderasyon pour lafanmiy Seselwa ki pe soufer.